

Hanya 40 peratus syarikat dimiliki usahawan Melayu dan Bumiputera
Astro Awani
08 Julai 2019

KUALA LUMPUR: Sebanyak 40 peratus daripada hampir satu juta syarikat yang didaftarkan Suruhanjaya Syarikat Malaysia (SSM) dimiliki oleh usahawan Melayu dan Bumiputera, Dewan Rakyat diberitahu, hari ini.

Timbalan Menteri Pembangunan Usahawan, Senator Datuk Dr Mohd Hatta Md Ramli berkata, jumlah itu menunjukkan penglibatan orang Melayu dan Bumiputera masih kurang dalam bidang keusahawanan.

Beliau berkata, keadaan itu wujud antara lain disebabkan sikap terlalu bergantung kepada bantuan kerajaan untuk menjadi usahawan.

"Kejayaan usahawan sebenarnya bergantung kepada daya usaha, kemahiran dan inisiatif mereka sendiri untuk merebut peluang dan ruang meskipun terdapat banyak bentuk sokongan daripada kerajaan," katanya semasa menjawab soalan Datuk Seri Ahmad Maslan (BN-Pontian) yang ingin tahu sebab orang Melayu dan Bumiputera kurang menjadi usahawan dan langkah meramaikan golongan itu pada sesi soal jawab lisan persidangan Dewan Rakyat hari ini.

Mohd Hatta berkata, kurang latihan dan kemahiran, kurang dorongan dan minat untuk meneroka peluang baharu selain masalah capaian kepada sumber kewangan turut menyumbang kepada kurangnya penglibatan orang Melayu dan Bumiputera dalam keusahawanan.

Pelbagai langkah dilaksanakan kerajaan bagi melahirkan lebih ramai usahawan orang Melayu dan Bumiputera seperti membudayakan keusahawanan melalui program 'outreach', bimbingan dan latihan serta mempromosi keusahawanan sebagai kerjaya pilihan.

Selain itu, khidmat nasihat dan akses kepada bantuan pembiayaan turut disediakan melalui agensi seperti Tekun Nasional dan SME Bank di samping menggalakkan program pembangunan dan pengukuhan koperasi.

-- BERNAMA

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/hanya-40-peratus-syarikat-dimiliki-usahawan-melayu-dan-bumiputera-212107>